

Bains culturals audiovisuals e Porta Alpina

Dallas tractativas da la regenza grischuna

■ (cc) La regenza grischuna ha approvà in project per segirar e per cataloghisar ils bains culturals audiovisuals. Plinavant ha ella consentì ad in contract cun las Viafiers federalas per l'utilisaziun da princip da las hallas da spetga da la Porta Alpina.

Ils portafilms ed ils portatuns che sa refereschan al Grischun duain vegnir registrads e digitalisads per pudair vegnir rendids accessibels ad in vast public. La regenza ha approvà in project per segirar e per cataloghisar ils bains culturals audiovisuals dal Grischun durant ils onns 2013 fin 2016. La direenziun generala dal project ha l'uffizi da cultura, partiziun promoziun da la cultura; realisà vegn il project da la Biblioteca chantunala. La finamira è quella da registrar en in inventari central ils portafilms ed ils portatuns ch'èn istoricamain impurtants e da segirar ils documents tut tenor lur grad da periclitaziun (d'als digitalisar), d'als cataloghisar e da metter a disposiziun publicamain las infurmaziuns en chaussa en in catalog online che sa chatta sin il portal da web, e quai sco ulteriur servetsch da la Biblioteca chantunala.

En il Grischun datti in grond dumber da medias audiovisualas – saja quai en ils archivs culturals sco er en ils museums, tar instituziuns, tar collecziunadras e collecziunaders e tar personas privatas. Fin l'onn 2016 pudessan – tenor stimaziuns – vegnir registrads e segirads circa 3500 documents. La consegna dals mediums audiovisuals a la Biblioteca chantunala

tras las proprietarias ed ils proprietaris respectivs ubain tras las titularas ed ils titulars dals dretgs vegn reglada cun cunvegns.

Il project ha in credit limità dad en total maximalmain 2,4 milliuns francs. Resalvada resta l'approvaziun dal credit per ils onns 2014 fin 2016 tras il cussegl grond. Per las lavurs dal project durant l'onn 2013 (tranter auter far il concept ed il carnet d'obligaziuns sco er far retschertgas e priorisar ils inventaris da las medias) ha il cussegl grond gia approvà in credit en sia sessiun da december 2012.

Utilisaziun da las hallas da spetga da la Porta Alpina

Per l'utilisaziun da las hallas da spetga da la Porta Alpina tras il chantun Grischun vegn fatg in contract cun las Viafiers federalas sco gestiunarias futuras e sco proprietarias dal tunnel da basa dal Gottard. La regenza ha approvà il contract d'utilisaziun cun las Viafiers federalas. Quest contract duai garantir – ord vista dal chantun – che las investiziuns ch'èn vegnidas fatgas enfin uss en la Porta Alpina a Sedrun stettian eventualmain a disposiziun per in project futur, dal qual l'intent n'è oz anc betg cler e sto anc vegnir definì. Il dretg

d'utilisaziun vegn concedì en spezial per las 4 hallas da spetga ch'èn vegnidas construidas en il rom da las investiziuns preliminaras da la Porta Alpina sco er per la garascha da mantegniment.

Tenor ina incarica da l'Uffizi federal da traffic vegn integrada fin il pli tard l'onn 2014 ina fanestra da visitadras e visitaders en ina da las 4 hallas da spetga, sumegliantamain al tunnel dal Lötschberg. Questa fanestra duai permetter d'observar ils trens rapids en il tunnel da basa dal Gottard e pia laschar experimentar il manaschi dal tunnel da viafier il pli lung dal mund.



In contract tranter il chantun Grischun e las Viafiers federalas regla l'utilisaziun da las hallas da spetga da la Porta Alpina.